



**Bedencken Etlicher Predicanten, Als der zu Schwebischen  
Hall, der in Hessen Vnd der Stadt N.N. auffs Interim Jhrer  
Oberkeit Vberreicht ...**

<https://hdl.handle.net/1874/430315>

8

3

Als das  
**Bedencken Ertlicher**

**Predicanten / Als der zu Schwe-**  
**bischen Hall / Der in Hessen**

**Und der Stadt N. N. auff**

**INTERIM**

**Ihrer Oberkeit**

**Oberreicht.**

**Psal. 116.**

**Ich glaube Darumb rede ich.**

**Ro. 10.**

**So man mit dem munde bekennet**  
**wirdt man Selig.**

**1 5 4 8.**

## Copey der von Hall.

**D**em ersten furtrage / vnd hernach in dem Radtsehlage etliche mal werden die Stende / so das heilige Euangelium angenommen / vnd ire Kirchen nach dem selbigen Reformirt haben / mit dem verdacht vnnnd aufflage beschreyet / Als ob sie von der Algemeynen Christenlichen Kirchen abgewiechen sein. Das dem nicht also sey / möchte mit gutem grunde Götlicher Schrift anders dargethan werden / Solche beschwerliche aufflage / vnserm Godt im Himmel zu klagen vnd zu befehlen.

Vnd das im furtrage vermeldet / Das die stende des Reichs gemeinlich bewilliget des Concilij erortrung zu erwarten / vnd dem selbigen zuleben / Biewol es recht vnd ordentlich ist / Das in streitigen sachen der Religion eine ordenlich / Christenlich vorsamlunge oder Concilium gehört werden sol / Jedoch so die stende der Kirchen / vnnnd Lehr / nach dem Euangelio reformiert sein / vnnnd also nye vnderstanden inn das furgenommen Concilium zuerwilligen / vnd sich desselben Sententz zuhalten / aller ding begeben. Haben sie itzt in dem weit zuviel gethan / vnnnd jr ewig heyl vnd Seeligkett / nicht dem Ewigem wort Gottes / sunder den Menschen vertrauet.

In dem Capitel die Lehr belangen / Von  
anfang



anfang des Adtschlags bis auff disß Capittel  
von der Kirchen / sindt vnder etlichen guten Le-  
ren / auch der Artickel der rechtfertigung des  
Menschen / der doch weitlenfftig / etliche Alle-  
gationes außs der Heiligen schrift vnd diese  
mit vnrechter anzihung.

Von der Kirchen vnd ihrem gebreuchen /  
dauon weitlenfftig in ihren Buch geschrieben /  
werden die so bisanher das Euangelium recht  
gepredigt als Heretici / Schismatici / Ketzer vnd  
Abtrünnige doch vnbenent angezogen / das wir  
Gott klagen / auch werden etliche schlusrede ein-  
gefäret / die außs vorgehender Lehr keins weg  
volgen.

Neben dem wirdt vermeldet / die Kirch habe  
zu dem gericht zwang dieweil sie gewalt hab zu-  
straffen etc. So doch Christus den Kirchen  
kein euserlichen / weltlichen gerichtszwang aus  
vermog des Euangelij zugestellet hat / wie ehr  
spricht / mein reich ist nicht von dieser welt / wie  
ehr auch selbst keiner ander straffe ( außserhalb  
seines Wunderbarlichen opffers ) gegen seynen  
Sängern vnd Predig kindern vnderfangen hat /  
denn allein sie / als ein Patter vnd Lehrmeister  
zu straffen.

In den Puncten von dem obersten Bi-  
schoffe / ist nicht one das eine / gebürliche Orde-  
nung vnder den Kirchendienern nützlich sey /  
aber die spruch der Heiligen schrift / so die  
Dichter desselbigen buchs allegieren / geben Pe-  
tro vnd seinen nachkommen / den Vebsten zu  
Rom kein solche Hocheit vnd Prerogatiua oder  
Gewalt

gewalt/wie das Buch vermeinet/vnd auch bis/  
anher mehr den zuviel practicirt ist.

Von den Sacramenten werden in gemein die  
alten sieben Sacrament widerumb erzelet vnnnd  
auffgericht / mit einer langen / weitlauftigen/  
doch vngrundtsamen vnd vnwarem grundt der  
Schrift / von solchen sieben Sacramenten / wie  
sie dis Buch der gebür/vnnnd bisanher von den  
Wepflichen ist gehalten worden/wissen wir die  
selbige / solcher gestalt in der Kirchen nicht zu  
gebrauchen.

Von der Tauff/gibt das selbige Buch zu/  
uerstehen / als hetten die Kinder keinen eygen  
Glauben/welchs wir / als die erwiessen warheit  
nicht annemen können.

Desgleichen auch von der Firmung der  
weyhe Bischoffe / Die weil sie kein grundt der  
Heiligen Schrift hat / können wir sie nicht  
billichen.

Von der Beicht ist offenbar / Das wir die  
Leubt/so dis Nachtmal empfangen wollen/vor/  
hin / nach einander ordentlich verhorn / vnnnd  
darnach Absoluirn / haben auch niemandes ge/  
botten oder vorbotten/ seine Sünde zuerzelen.

Das aber vorhin das Volck zuerzelug der sün  
den mit trawungen der verdamnisse / vnd aus  
diesem grunde/wie dis Buch gesetzt/als were  
der Priester ein Richter vber die Sünde / vnnnd  
könte sie durch die Absolution nicht vergeben/  
sie würden denn mündtlich erzelet / dringen sol/  
ten/das können/vnd wissen wir mit guthem ge/  
wissen nicht zuthun.

Vom



Vom Sacrament des Altars / Bringet das  
Buch die Disputation für / von der Transsub/  
stantiation / das ist / das die substantz des Brots  
vnd des Weins / im Heyligen nachtmal Christi/  
inn den heyiligen Leib vnnnd Blut verwandelt  
were / vnd schilt grewlich die andern / so solchs  
als vnnötig nicht halten / Vertzweyffler der Al/  
mechtigkeyt Christi / vnd das sie ihren Christum  
zu einem Lügner machen. Solchs fürgeben  
von der Transsubstantiation als ein Traum  
der alten Sophisten / der keins wegs in der Hey/  
ligen schrift ist bewyesen / wissen wir für kein  
gewisse warheyt zuhalten / vnnnd lassen dennoch  
Christo sein Almechtigkeyt / vnnnd gewisse war/  
heyt / seines Leibs vnnnd Bluts / mit Brodt vnnnd  
Wein / in seinem heyiligen nachtmal.

Von der Delung / welche die Römische  
Kirch selbs nicht für ein notwendig Sacrament  
halten / Dieweil dis Buch mit falsch angezoge/  
nen gründen der schrift wil auffgedrungen wer/  
den / wissen wir das nicht zuwilligen / vnnnd die  
Delung für ein Sacrament zebrauchen.

Desgleichen halten wir für einen vnnützen  
Ehandt / die Ordines inn der Priester weyhe/  
wie sie im Buch genennet werden / Ehrhüter/  
Beschwerer / Leser / Koluthen / Epistler / Euan/  
gelier etc. Dieweil der gebrauch dieser Ordnung  
ausserthalb des Predigs vnnnd Pfar ampts / vor/  
langest vergangen vnd von menschen erdacht/  
ein vnnütz ding sein.

Von der Ehe / will das Buch kein ehe schey/  
dung vmb des Ehebruchs willen dieser gestalt  
zulassen / das dem gescheydnen / sich widerumb  
sunst

sunst zuuerhelichen erlaubt sey / bestetigt auch  
die handtlich verlaubnisse der Jungen wider der  
Eltern wissen / vnnnd willen / wiewol nun dieser  
handel inn die Weltlichen recht gelanget / jez  
doch so viel wir es der Heiligen schrift / von  
diesen sachen verstehen können / Wissen wir (so  
wir zum Ehegericht fürder solten getzogen  
werden) vnser bissanher bekante meynung vnnnd  
gebrauch / nicht zu endern.

Im Artickel von dem oppfer der Messe / helt  
diss Buch eine feine rechte Predig. / von dem ei-  
nigen Dpffer / das **CHRISTVS** Sein mal an  
dem Creutz für vnser Sünde gethan vnnnd vol-  
lenbracht / aber es werden hierauff viel vnrechte  
stücke eingefüret / die kein grundt haben  
noch angommen sindt. Denn das Buch sa-  
get / vihe oppfern / sey den Heyden von natur /  
alls ein natürlich gesetz / eingepflantzet / sol-  
ches reimet sich mit der warheit nicht / Denn  
alswenig die erkentnisse **CHRISTVS** / der ver-  
nunfft des Menschen / ist natürlich eingepflan-  
tzet / als wenig sindt der natur die Dpffer  
so **CHRISTVS** bedeytten / bekandt gewe-  
sen / Sonder die heyden / so von den Patriarchen  
herkommen / haben die Dpffer allein / auß vor-  
bildt der Patriarchen / ohne rechten Glauben  
behalten / vnd nach dem sich die vernunfft nicht  
hat darinn richten können / vnnnd den glauben  
der Patriarchen nicht behalten / So haben die  
vernunfftigsten weysen Heyden / das Dpffer der  
Ochsen / für gantz vnbillich vnnnd vngütlich ge-  
schtet / Das buch wil aus der Heyden Dpffer ere-  
weyfen



wyfen/ das derhalben billich bey den Christen  
die Messopffer sein solle / solches ist alles vn-  
gereimet / wie das auch gar verzucket ist inn  
diesem Buch / das man zyhe die gnade Göt-  
tes / durch das Opffer / an sich.

Wiewol nun von dem einigem Opffer / so  
CHRISTUS ein mal für vnns am Creutz ge-  
than hat / inn dem Buch der Resolution recht ge-  
schrieben ist / Jedoch ist das nicht leidlich/  
das die Lichter dieses Buchs machen tzweyer-  
ley gebrauch auß dem Abentmal / Der ein ge-  
brauch soll sein / das es sey elne seeltge narung  
der Seelen. Der ander / das es sey ein Opffer der  
gedechtnisse / des Leydens vnd Sterbens Chris-  
ti / den Aposteln zu opffern mit diesen worten/  
Hoc facite / das thut / beuohlen / Daraus her-  
nach volgen wirdt / das man widerumb solle  
die Messe mit allen Ceremonien / mit einschlie-  
ßung des Canons / wie inn der Bestlichen Kirch  
en bis anher gebreuchlich halten sollen.

Geben auch hernach zuuerstehen / als hette  
CHRISTUS im Nachtmal selber geopffert / vnd  
wollen das mit der Heyligen Veter spruch  
schmücken. Nun ist es kundtbar vnd offenbar /  
auß allen Euangelisten / die vom Nachtmal  
schreiben / auch auß Sanct Paulo / das CHRIS-  
TUS im Nachtmal nichts geopffert / hat  
auch darinn kein opffer zuthun beuohlen / son-  
dern allein ein gedechtnisse seines eigen Opf-  
fers / so am Creutz dazumaln bescheen solte /  
vnd itzt gescheen ist / gestiftet / vnd ein-  
gesetzt / Denn ehr saget außdrückenlich  
das



das thut zu meynen gedechtnisse. Was thun?  
opffern in keynem weg / sondern was ehr vnd die  
Jüngern gethan haben / Nemlich das Brodt  
vnd den Kelch nemen / Segnen / dem Herren  
dancken / Aufsteylen / Essen vnd trincken / vnd  
darbey seines Tods gedencen / vnd verkündi-  
gen. Also hat der Heylige Paulus dise wort/  
Hoc facite / das thut / selbs klerlich außgelegt  
1. Cor. 11. da ehr sagt / solches thut so offt ihr  
das drincket / zu meynen gedechtnisse / Denn so  
offt ihr von diesem Brodt esset / vnd von diesem  
Kelch drincket / Solt ihr des Herrn tod verkün-  
digen / bis das ehr Kompt / wider die außse-  
gung sein wir schuldich keine ander / Ja auch  
keins Engels vom Himmel anzunemen. Vnd  
diweil Christus dis hat eingesetzt / zu seiner  
gedechtnisse / so hat er hiemit vnuerborgenlich  
zuuerstehen geben / das ehr es zur speyse der See-  
len / das ist zur stercke des Glaubens gestiftet  
hat. Hierauff kömmen die dichter dieses Buchs /  
vnd lassen es nicht darbey bleiben / das es sey ein  
gedechtnisse des einigen opffers Christi / sunder  
verkeren dasselbig mutwillig / vnd machen dabey  
auch ein opffer der gedechtnisse / als solten es  
tzwey vnderschiedentliche ding sein / ein gedecht-  
nisse des Opffers / vnd ein Opffer der gedecht-  
nisse / so es doch im grund nur ein ding ist / aber  
von ihnen dahin gedacht / das hiemit die Best-  
liche Messe erhalten würde / denn das die heylig-  
en Vetter / die von den Dichtern dieses Buchs  
eingezogen werden etwan dieses nachtmal ein  
opffer genennet haben.

Ist mit diesem verstandt zuuernemen/  
wie

wie sie es selbest zum mehrmalen deuten / Nemlich / das es für sich selbst kein opffer sey / sonder allein ein gedechtnisse / des einigen opffers Christi am Creutz gescheen.

So aber die dichter dieses Buchs wollen mit dem Opffer im Nachtmal verstehen das geistliche Opffer / das im glauben geschicht / Christus habe sein Leib vund Blut für vnser Sünde geopffert / vund stellet das Gepett für Gottes angesichte / das es vns Gnedig sein wolle / So ist es nicht mehr ein besonder Opffer / das den Aposteln vund Kirchendienern allein / sondern allen Christen zuthun befohlen ist / geschicht auch nicht allein im Abentmal / Sonder alwege / so oft vund dicke ein fromer Christ glaubt vund bettet. Der Almechtige Barmhertzige Godt / wolle ihme / von wegen des Leydens vund Sterbens / seines lieben Sons / gnedig sein vnd jm seine sünde verzeihen.

Demnach wissen wir die lehre dieses Buchs von dem Opffer der gedechtnisse / als ein vnder schiedlich ding / von der gedechtnisse des Opffers keins weges / wie es darinne gedeutet vund außgedennet wirdt / anzunemen / Vnd vns mit auffrichtung der Vepflichen Mess dar nach zurichten / Nach dem wir inn aufsteylung des Nachtmals / So wir bisanher auß Gottes gnaden / Vermög des heyligen Euangelions gehalten / die rechte gedechtnisse des einigen Opffers Christi / nach nodturfft vund zu nützlichem gebrauch genungsam haben.

Im Capittel vom gedechtnisse der Heyligen inn der Opffer Messe zuhalten / Daraus das  
B auch



auch schliefen will / man sol die gestorben Hey-  
ligen anrufen / vnd Letaney von ihnen halten /  
wie im Bapstum breuchlich / darauß viel vnd  
öffentliche Abgötterey entstanden ist / Können  
wir nicht billigen noch willigen. Wie aber die  
Heyligen für vns bitten / vnd sie zuehren sein /  
haben wir getrewlich bisanher / inn denn pre-  
digen nach der Confession vñ apologye genugs-  
sam dargethan.

Gleicher weyse Können wir nicht auffne-  
men / das man der abgestorben dermassen ge-  
dencken soll / das man für sie bitte / Gott wolle  
sie auß dem Fegfeuer erlösen / auch Vigilien  
vnd Messen für sie halten / wie das Buch auß  
den heyligen Vetern vermeinet zubeweysen / vnd  
wiewol das Buch nicht außdruckenlich von  
dem Fegfeuer prediget / gibt es doch mit den sprü-  
chē der Veter genugsam zuuerstehen / das es auff  
das Fegfeuer schantzet.

So viel aber der Vetter sprüch belanget /  
lehret Augustinus klerlich / das man im schrei-  
ben vnd meynung nicht mehr glauben geben  
darff / denn so viel sie auß der heyligen schrift /  
oder sunst auß genugsamen Fundschafften er-  
weyssen / Es hat aber noch kein alter schreiber  
vnder den Vetern / auß der heiligen schrift be-  
wehret / das ein solch Fegfeuer sey / wie sie es vn-  
ter dem Bapthum fargeben / Dies mal lassen  
wir diesen Puncten inn seinem vnwerdt auch  
passiren.

In dem letzten Capittel von den Ceremo-  
nien vnd gebreuchen des Sacraments / werden  
fast alle alte Mißbreuch im Bapstum ge-  
übet

übet/ widerumb auffgerichtet/ vnder denen wol  
etliche mittelmessige stücke seindt/ Darumb man  
vnnötiges zanken solte vermeiden/ dabey auch  
die kindigen / lyederlich Ceremonien sein sollen/  
als Fanen/ Creutz etc. Jedoch dieweil der zusatz  
inen ingehengt bleibt des alten aberglaubischen  
Missbrauchs / so abgangen / können wir die  
widerauffrichtung desselbigen nicht billichen.

Vnnd das ergest ist das die Messe alle ding  
mit ihren Ceremonien vnnd Canone also gehal  
ten werden. Item das man die Vigilien vnnd  
begrebnissen der Todten begehcn sol / wie von  
Alters her / vnnd das es sey ein grausamicheyt  
der Todten (so man itzt ergebene breuche nicht  
heltet) nicht zugedencken / Eben als solten diese  
grewliche thun/die nicht Seelmessen vnd Vigili  
en/nach Vebstlicher weyss vnd ordnung der tod  
ten nicht gedencken / solches kan man zu der  
Christenlichen Kirch beschwerung nicht recht  
geben.

Die Karwochen mit ihren hützenern Gloc  
ken / die Letaney an Sanct Marcus tag / vnnd  
dergleichen kindische lecherliche zusetz / werden  
mehr verachtung vnd gespötte bringen / den an  
dachtung zur besserung etc.

Die geduldung des entpfahens des heylig  
en nachtmals vnder beyderley gestalt / wie inn  
diesem beschwerlichem / vnnd vns zu annehmi  
lichem anhang nachgegeben / das man die ent  
pfahung einerley gestalt/die wider die einsetzung  
Christi erhalten wirdt/nicht solte verwerffen.

Auch werden die Reden dieses Buchs /



Dahin vermeinet / Das das Sacrament ins  
Heußlin gesetzt / vnd ymbher getragen werden  
solte / vnd also widerumb zum mißbrauch der  
abgangen / angericht solte werden / Nun sein  
die Opffer messe / Seelmesse / Vigilien vnd an-  
dere der gleichen gebraucht / Von wegen ihres  
alten greulichen Mißbrauchs / auß vermög  
Gottes worts / inn der Kirchen bey vnß abge-  
than / Darumb wollen / vnd wissen wir sie nicht  
widerumb mehr auffzurichten vnd zuhalten.

Der König Ezechias hette die Eherne  
schlange / durch welche vortzeiten grosse Wun-  
derwerck in der Wüste an dem Volck gescheen/  
gantz abgethan vnd zubrechen lassen / Nach dem  
sie zu seiner zelt inn einen schedlichen Miß-  
brauch vnd Abgötterey gerathen war / Dieweil  
sie nun auß vermög Göttliches worts / welches  
gebent die Greuel hinweg zuthun / auffgehoben  
würden / So es niemandt gebüret / sie widerumb  
zu schmücken vnd auffzurichten. Also / wiewol  
das Opffer der Messe / die Vigilien / die Letany-  
en / vnd der gleichen mehr stücken / als lyederlich  
geschmückt werden / Jedoch nach dem sie vor-  
hin inn einem öffentlichem Mißbrauch gewes-  
sen / auch gewisslichen mancherley Abgötterey  
inn die Kirchen gebracht haben / vnd aber dar-  
auff auß vermög Göttliches worts abgethan /  
So kan man wol den getrewen dienern Göttlich-  
es worts / das leibliche Leben nemen / Man kan  
aber nimmermehr rechtmessige Göttliche vrsach-  
finden / Die abgethanen Mißbreuch / aberglen-  
bischen Gottes dienst widerumb anzurichten.

Hierauff wollen wir / so viel vnser Person  
belanget / die widerauffrichtung der selbigen/  
Lebendig / Durch verleyhung Göttlicher gnaden/  
solcher gestalt / wie das Buch der Resolution  
fürgibt / nimmermehr billichen / noch dartzu  
verhelffen.

Wir sindt / als arme Kirchendiener / Kei.  
Mai. vnserm aller Gnedigsten Herren / Inn ihr  
Mai. Weltlichem reich / auch E. E. W. allen  
vnserm möglichen fleiss vnnd gehorsam inn aller  
vndertgenigkeit zuleisten vrpütig. Aber so man  
wolte ahn das reich Christi / des wir arme Die-  
ner sindt / greyffen / vnnd vns etwas schwerlichs  
wider vnser gewissen / inn vnserm ampt auff-  
dringen / verhoffen wir / der Almechtige Barm-  
hertzig Godt werde vnns durch seynen lieben  
Son / für dem vnrecht zuthun gnediglich bes-  
waren.

Bis hiher haben wir E. E. W. vnser bey-  
der Bedencken vnd meynung inn dem Buch der  
Resolution / Auch was wir inn der Lehr vnnd  
Kirchen gebreuchen / mit gutem gewissen thun  
oder nicht thun können / gehorsamlich ange-  
zeigt.

Wie sich aber dargegen E. E. W. mit an-  
nehmung oder verwerffung dieses Buchs halten  
solle / zweyffeln wir nicht / so dafür gehalten  
wirdt / die Lehr des Heiligen Euangelij / so auß  
Gottes gnaden zu dieser zeyt an das Licht kom-  
mē / sei die Gründliche ewige warheit / wie sie auch  
gewisslich ist / E. E. W. werde sich selbst daraus  
was ihr zu thun vnnd zuwilligen sey / zuberich-  
ten wissen / Diese sacht ist wichtig vnd gross / vnd  
gilt ein



gilt ein jedem sein selbst Seeligkeit oder Verdammnisse. So wil auch die zeit verhanden sein / das man zweien Herren zumal nicht dienen kan / hierauff verhoffen wir / es werden noch bey etlichen Erbarh Stenden oder stedtē / so viel Christenliches gemüts erfunden / das sie sich mit rechtem eyffer Gottes / des handels vnderfahen / vnnnd Kei. Mai. ihre beschwerden / inn einer supplication / auff das vnderthenigste anzeigen / die selben bey ihrer Mai. so viel nur möglich abzutragen. als denn möcht sich E. E. W. dieser Supplication anhengig machen / Denn es hat die Kei. Mai. hierin noch nichts gebotten / sondern allein ein zumutung gethan. So ist ihr Kei. Mai. inn dem fürtrage selbst vrpütig inn dem artickel von den Ceremonien vnnnd anhangenden Artickeln / wa vnnnd so viel von nöten / itzundt vnnnd alle zeit mit gebürlicher mass vnnnd ordnung zugeben / gibt also den stenden selbst inn die handt / das sie ihrer beschwerunge fug haben anzuseygen / vertröstet auch einer miltung.

Man möcht aber inn den Supplicationen / vier vrsachen fürwenden / nemlich / das die Religion sache / durch die Kei. Mai. vnnnd reichstende auff gemein Christenlich Concilium geschoben / So denn diese stende noch vnuerhindert vnnnd vnuerdammet / vnnnd verendrung ihrer Lehr vnnnd Kirchengebreuch itzt bescheen solten / vnnnd dennoch nachgeendes / vor dem Concilio auch fürzunehmen / so würde das Concilium vergebens fürgenommen. Item so sein die Lehr vnnnd gebreuch nun mehr denn bey fünff oder sechs

sechs vnd tzwentzig Tharen inn ihren Kirchen  
gestanden / vnd ist das gemeine volck auß ley-  
en sprüchen der heyligen Schrift dahin gewie-  
sen / das es nicht anders helet / denn es seyn die  
rechten Göttlichen Kirchen gebrauch / hierauff  
so würde die enderung mercklich ergernisse er-  
wecken.

Item so sein vieler stedte Bürger vnd vn-  
derthanen / grosse merckliche vnd verderbliche  
beschwerung / von dem zugelegtem kriegesvolcke  
begegnet / vnd sie also inn kummerlichen schmer-  
tzen vnd schaden ihrer zeitlichen güter vnd na-  
rung kommen / So denn vber das / ihnen die biss-  
anher gebrauchte Lehr vnd kirchengebrauch  
genommen / würde es nicht anders von ihnen  
verstanden / denn das / wie man sie vorhin vmb  
das zeitliche gut gebracht / also wolte man sie  
itzundt vmb das ewige auch bringen.

Item so sey man vrpüttig / so viel das zeit-  
liche vnd pfrunden gutt belanget / des ordent-  
lichen rechtens / oder gemeiner recht ordnung  
zugeleben.

So nun dieses von den erbarn Stedten aus  
rechter Gottes forcht vnd gehorsam / fürge-  
nommen würde / ist gute hoffnung / Gott würde  
sein gnade öffentlich erzeigen wie denn vorhin /  
da es zuuor viel gefehrlicher stundt / der barm-  
hertzige GOTT ein gnedig außkommen geben  
hatte etc.

Johannes  
Johannes

Jfenmannus.  
Brentz prediger.

zu Hall.





# Antwort der diener des Euangelij

Im Fürstenthumb Hessen/vff das Mandat/so  
Ihnen von ihrem Gnedigsten Herrn dem  
Landtgrauen gethan/ des Interims  
halben.



Das wir das Interim nicht anneh-  
men können / oder wollen / bewegt  
vns kein fürwitz/oder sundere Affec-  
tion / denn alleine die gewaltigen  
Sprüche **EX** Isti Matt. 10. Capit-  
tel/wer mich bekennet für der Welt/  
Den wil ich bekennen für meynem  
Himlischen Vatter / Paulus zum  
Galla. 1. Capittel/wenn ein Engel vom Himmel ke-  
me/vnd prediget ein ander Euangelion denn ich  
euch gepredigt hab/der sey verflucht.

Johannes inn seyner .ij. Epistel am letzten  
Capittel / wer zu euch kömpt / vnnnd bringt diese  
Lehr nicht mit/den nemet nicht zu Haus/ Grüss-  
set in auch nicht / das ihr seyner bösen werck ni-  
cht Teilhafftigt werdet / müssen wir denn vber  
diesem bekentnis/das Landt reumen/ So haben  
wir diesen trost / wie der .xxiij. Psalm sagt/die  
Erde ist des **HERREN**/ vnnnd alles was dorin/  
nen ist.

Müssen wir aber die Welt lassen / vnd vnser  
Leben verlieren/So haben wir diesen Trost Chri-  
sti / Der do spricht / In meines Vaters Reich  
seindt viel wonung.

So wir nu bestendigk bleiben / so haben wir  
Menschen vnd Teuffel zu Feinden/die menschen  
aber sterben/die Teuffel werden verdampt.

Fallen

Fallen wir aber abe vnnnd verleucken das E  
uangelium / So haben wir Gott / alle Engel vnd  
alle Heyligen zu ewigen feinden / darfür Gott E.  
F. G. vnd vns allen gnediglich behüten wolle/  
Amen.

Alle Superattendenten vnd Pfar  
hern des Furstenthumbs  
Hessen Etlich vnd vierzig.

Bedencken der Stadt N. N.

**B**ersichtige / Erbare /  
Weyse / Günstige liebe Herrn / Nach  
dem E. V. E. W. vnns das J N  
E E R J M zuvorlesen / vnd was  
darinnen der gewissen halben vn  
schedlich zuthun befunden werden / E. V. E. W.  
anzuzeigen / befohlen / Haben wir dasselb / vnder  
handt genommen / vnnnd semplich nach vnserm  
geringen verstandt erwogen / Vnd können keins  
weges verbergen / das wir inn vnsern gewissen /  
nicht geringe entsetzunge vnd erschrecken dar  
ob entpfangen / das wir mit dieser aller wichti  
gesten vnd auch geuerlichsten sachen / die G. D.  
tes Ehr / rechten waren Glauben / vnnnd G. D. des  
dienst / sambt der Seelen heyl belanget / etwas  
rathen sollen / nach dem man inn das J N E E  
R J M schon bewillget hat / von wegen der  
schweren vnd schedlichen ergernisse / die allent  
halben / vnd inn allewege daraus entstehen vnd  
eruolgen wöllen / Denn ob wir vnns gleich die  
hoffnung / wie ein traum einbilden / als möchten  
wir der hochbeschwerlichen Puncten / so darein  
E vorleibt



vorleibt vberhaben bleiben/wo wir etliche gerin/  
geding annehmen/So ist vnd bleibt doch solche  
hoffnung auch bey vns selbst/zur zeit noch ynge/  
wis/vnnd bey allen andern Kirchen/die sich an  
vnser Exempel stossen vnnd ergern werden/vn/  
glaublich vnd yngründlich/Vnd wird also auch  
die aller geringeste enderung ein ansehen haben/  
eins anfangs/das gätz **M&E&X** ins werck  
zu bringen/wie es vormals mit worten bewillit  
get ist.

Vnnd ist zubeforgen/solchs ergerlich anse/  
hen/werde viel schwacher Kirchen vmbstürtzen/  
vnnd gleich wie eine Pestilentz mit gehem tode  
dohin reissen/Das sie als die schwächsten vnnd  
die man am hefftigsten wird schrecken/das gan/  
tze **M&E**rim werden annehmen mit diesen ge/  
dancken/als werde es doch zu letzt/auch bey vns  
eben solchen weg erreichen.

Des gleichen werden vns auch die Kirchen/  
die das **M&E&X** gar nicht annehmen/auch  
für abfallende glieder halten/Vnd ihr gemein/  
schafft vnd gebet von vns wenden/So vns doch  
dagegen die Papiſten/vmb solcher geringer ne/  
werunge willen/noch nicht/als ihre mitglieder  
vnnd rechte Christen (wie wir auch nicht sollen  
begeren) erkennen vnd annehmen/vnnd werden  
wir/als ein newe secten werden/vnd new Schis/  
ma machen/aus vnser eigener verschuldung/  
So doch das erste Schisma oder spaltung nicht  
aus vnser schult/die wir irthumb vnd mißbren/  
che verlassen/vnnd die warheit angenommen ha/  
ben/Sondern aus der Papiſten schult/so die  
warheit verfolget haben/entsprungen ist/vnnd  
wird

wird das letzte erger denn das erste / Nemlich /  
aus zweyen secten drey werden.

Über das werden sich die Papisten vber vn-  
serm Exempel stercken / vnnnd in ihrem alten vn-  
christlichen / abgöttischen wesen fort fahren /  
der hoffnung / wir werden doch entlich alle ihre  
grewel müssen widder annehmen / vnnnd ihnen  
gleich werden / Vnd wer sich vnter ihnen solchs  
vnchristlichen abgöttischen lebens eussern wird /  
den werden sie mit wasser / fewr vnd schwert ver-  
folgen vnnnd hinrichten / wie sie vormals bis an-  
her auch gethan haben.

So ist auch das vor Gott nicht zuuorant-  
worten / das durch annehmung dieses M<sup>A</sup>E<sup>R</sup>  
rim das Euangelium vnd aller Gottesdienst / zu  
einem weltlichen Reichs handel gemacht / vnnnd  
die sachen die vnter das schwert gehören / einge-  
zohen werden. So doch das Reich Christi nis-  
cht ein weltlich Reich ist / vnd der recht glaube /  
samt den rechten Gottes dienst / nimmer mehr  
mögen mit gewalt vnd schwert erzwungen wer-  
den / Sondern sollen vnd müssen / allezeit freywil-  
lig von hertzen / vnd aus dem heiligen Geist her-  
fließen.

Es geschee auch / wo es also forth gehen sol-  
te / den andern Kirchen / so nicht vnder dem R<sup>ö</sup>.  
Reich / vnnnd dennoch rechte ware Christen seint /  
zum sondern nachteil / Wenn sie müsten gleub-  
ben / was auff dem Reichstage beschloffen weh-  
re / oder nicht würde / oder müsten aber die schan-  
de tragen / als gleubten sie nicht recht oder we-  
ren alle Schismatici oder abgewente / Welche  
schmahe / als denn Ch<sup>R</sup> Ist<sup>o</sup> selbst widerführe /



Wund was k̄onte itzundt anderst widd er vnns  
vermutet vnn̄d geurteilt werden / wenn wir vn̄  
fern glauben vnn̄d Gottes dienst / nach willen  
vnn̄d wolgefallen der Ih̄enigen w̄urden rich̄  
ten / die vn̄ser mit dem schwerdt mechtig seindt /  
Vn̄angesehen / ob sie wider vnd on Gottes wort  
daher fahren / Denn das wir des R̄urcken Alco  
ran / wo ehr vnns / do Gott f̄ur sey / yberweldi  
gen / auch w̄urden annehmen / Ehr wir Leib / le  
ben / Ehr vnd guth dran setzen / vnn̄d solt dieser  
sachen halben / das Gott gnediglich verh̄uten  
wolle / ein erregung inn deutzschen Landen ge  
scheen / k̄onten wir inn vn̄serm gewissen nicht  
entschuldigen / noch rein achten / das wir nicht  
auch zum teil vrsachen dartzu hetten gegeben / so  
wir mit rath vnn̄d that dartzu h̄ulffen / das dem  
M̄ERK̄ die th̄ur auffgethan / vnn̄d es inn  
etzlichen st̄ucken / n̄och denen die andern / so vn̄  
treglich sein / dester leichter m̄ochten hinnach  
dringen / hetten helffen einf̄hren / viel mehr w̄ur  
den wir andern leuten vordechtigk. Als die von  
der warheit / on redliche vrsache / widd̄er weren  
abgefallen / vnd also nicht in geringer gefahr ge  
setzt / der wir gewarten / so wir des M̄ERK̄s  
m̄ussig stehen / Vnd ist also offenbar / das in die  
sem handel / die grossen ergernis eingewickelt  
sein / vnn̄d herf̄ur brechen wollen / so in der gan  
tzen Christenheit erstehen vnd erfunden werden  
m̄ogen / Den damit gibt man vrsachen / zum fall  
den schwachen kirchen / die durch vns geergert  
werden / vnd wird schuldig an allen seelen / die in  
solchem fall vorderben / Man meret die trennung  
ge vnn̄d wird schuldig an allem dem vn̄rath / so  
daraus

Daraus volgen / man würde teilhafftig aller Pa-  
pistifchen grewel vnd alles vnschuldigen bluts/  
so sie vergoffen haben / vnnnd vergiessen werden/  
Man macht aus dem Reich Christi einen Tyrann-  
nischen weltlichen mord zwangk / erregt widder-  
willen / vnnnd verachtung vnser bey ander Christ-  
lichen Nationen / macht sich abfals vordechtig /  
vnnnd gibt vrsach zu allerley bitteren gedanken /  
Daraus entlich ein vnwiderbrenghlicher vnrat  
entstehen vnd eruolgen möchte. Nun spricht io  
Christus / Wehe dem menschen durch welchen  
ergernis kumpt / Es were ihm nützer ein mülftein  
hing an seinem halse / vnnnd würde damit ins  
Meer vrsenckt / welchs yo ein schrecklich vnteil  
ist.

Darumb können wir nichts anders erken-  
nen noch sagen / denn das die jenigen wol ge-  
than / so das gantze Interim gewegert haben /  
Wissen auch kein anders mit gutem gewissen zu  
rathen / denn das man seiner gar müffig stehe /  
ymb der ergernis willen / damit wir vnser gewis-  
sen nicht wollen beflecken / Wo es aber an vnnnd  
aufferhalb der ergernis were / so möcht man etli-  
che stücke one nachteil des gewissen leiden / Etli-  
che auch ymb friedes willen thun / zuuor wenn  
man gewis were / das man mit den Abgöttischen  
vnnnd lesterlichen stücken / vnbeschwert solt blei-  
ben.

Leiden könnte eine Christliche gemeine / was  
man ihr für feiertage aufflegete / doch mit dem  
berichte / das man feierte Gottes wort zu hören /  
Sacrament zu empfangen / zu beten vnnnd zu dan-  
cken vnd nicht den Heiligen / Nach deren namen  
E iij die Fest



die Feſt genant werden / zudienen / denn man ſol  
Gott anbeten vnd ihm allein dienen.

Leiden könte ſie auch / das man ihr etliche  
tage das fleiſch verböte / Aber das ſelbige wil vor  
eine geiſtliche Zucht geacht werden / diſtlich  
dartzu / das vnſer fleiſch dem Geiſt gehorſam ſey /  
müſſen die / ſo ſölich verbot treiben / den heyligen  
Paulum gedulden vnd laſſen zeugen / wie ehr den  
.i. Th. iij. weiſſaget vnd ſpricht / der Geiſt ſagt  
deutlich das inn den letzten tagen / etliche wer-  
den vom glauben abtreten vnd anhangen den  
verfüriſchen Geiſtern / vnd Teuffels lehren /  
durch die ſo inn gleiſnerey lägenredner wär-  
den ſein / vnd Brantmal inn ihrem gewiſſen  
haben / vnd verbieten Ehelich zu werden / vnd zu  
meiden die ſpeiſe die Gott geſchaffen hat zu ne-  
men mit danckſagung den gleubigen.

Das iſt ja nicht von Ketzern geredt / die vor-  
geblich widder die Ehe vnd Speiſe plaudern /  
mit vngegrüntem worten / ſondern von den ge-  
waltigen inn der welt / ſo die Ehe vnd Speiſe  
mit teglicher exequution weren / das iſt auß den  
worten Pauli lauter / klar vnd vnwiderſprech-  
lich / wollen derhalten niemandt rathen / das  
ehr ſich ſollichenn ſcharffen worten des heiligen  
Geiſtes theilhaftig mache.

Das man die privat Abſolution ſuchet / vnd  
inn der Kirchen erhilt / were nicht allein leidlich /  
ſondern auch gutt / wenn ſie nicht der Papiſti-  
ſchen Beicht / mit allen ihrenn greueln wider  
auffzurichten gefährdet würde / welche nicht ein-  
zureumen iſt.

Darumb

Darumb wo man die priuat Absolution  
wieder wil anrichten / da müssen die Prediger  
wieder das nödtige erzelen / aller sünden / vnd wid  
der die vormeinte genugthuunge vnser eigen  
wergt vleissig predigen / Das mag denn wol so  
viel vnruhe geperen / als die Absolution zu einig  
Zeit dienet.

Singen vnnnd lesen inn der Kirchen / so lang  
ge vnnnd so viel als man wil / Deutzsch oder Latei  
nisch / so fern es GOTTES wort / oder ja dem  
selbigem gemess ist / wer am wenigsten bes  
schwerlich / wo sie nicht ihre sieben tageszeit das  
mit gedechten auffzurichten.

Dieweil aber vnser Kirchen / zu dem selben  
nicht verbunden / hat man wol fugt / darinne vn  
beschwerliche ordnung zu halten oder zu mach  
en / wenn das gemeine ergernis nicht mit ein file.

Ausserhalb dieser stück wissen wir nichts  
das man ohne beschwernus der gewissen thun  
könte / wenn gleich das gemein vnd gros erger  
nus hindan gethan würde / Denn die andern  
Ceremonien alle / so wir hingelegt haben / vnnnd  
vom J N E X I M wider gefordert werden /  
seint wider auff falsche lehr gegründet / oder  
abergleubisch / wie zimlich ann tag gebracht ist  
worden.

Nun können wir ja schwerlich vermuthen /  
das man diesen geringen dingen / einen solchen  
schein eins gehorsams vnnnd der einigkeit könne  
machen / das man darunder sicher vnnnd mit den  
vbrigen vnleidlichen Abgötischen Ceremonien  
so der ehr vnd heiligkeit Christi abbrüchig sein /  
vnbeschwert möcht bleiben.



Solt man denn abn alle furcht ein ergerli/ chen/ ein beschwerlichen anfang vnnnd eingangß des M&E&M&S machen/dardurch vielert ges wissen verwirret/vnd betrübet möchten werden/ Das würde Gott keines wegcs gefallen vnd vnt gestrafft nicht bleiben.

Wissen vns derhalben solcher ferligkeit mit guttem gewissen nicht teilhafftig zu machen/ bitten E. W. E. W. wollen solchs von vns nicht anders / denn guter getreuer vnnnd vntertheniger meynnng vornehm/ men/vnd das ihnen lassen beuohlen sein.



*[Faint, mostly illegible text, likely bleed-through from the reverse side of the page.]*

*[Faint, mostly illegible text, likely bleed-through from the reverse side of the page.]*